

Orang Cina sedang menilai Tun Mahathir

SINAR HARIAN

19 JANUARI 2018

WARTAWAN SINAR HARIAN

SHAH ALAM - Penyertaan Tun Dr Mahathir Mohamad ke dalam Pakatan Harapan dijangka beri kesan kepada pengundian masyarakat Cina terhadap gabungan itu.

Ahli Parlimen Kepong, Tan Seng Giaw mengakui, masyarakat Cina ketika ini sedang menilai sumbangan, jasa dan tujuan Mahathir menyertai Harapan.

“Jika bercakap soal trend pengundi Cina di Malaysia, biasanya di kawasan bandar di mana-mana negara pun memihak kepada pembangkang, cuma kali ini masalahnya rumit sedikit iaitu keadaan politik telah berubah terutama apabila Mahathir jadi pemimpin pembangkang.

“Mengapa beliau berbuat demikian dan sebagainya. Semua orang sedang menilai apakah akan dibuat pemimpin lama ini,” katanya dalam sesi temu bual di Facebook Live Sinar Harian, semalam.

Ditanya sama ada pengundi Cina akan menyokong Mahathir, beliau berkata, perkara itu sukar diramalkan.

Seng Giaw mengakui DAP berdepan cabaran memenangi kerusi campuran setelah parti itu memutuskan hubungan dengan Pas.

“Pas memang ada sokongan masyarakat Melayu dan Islam. Apabila Pas keluar (Pakatan Rakyat), banyak tempat yang ada pengundi Islam kita belum tahu lagi, sama ada mereka akan tinggalkan DAP atau tidak.

“Tanpa Pas, ada sesetengah kawasan lebih susah dimenangi, contohnya di kerusi campuran, peratusan pengundi Islam tinggi,” katanya.

© 2017 All Rights Reserved • Karang kraf Group Media • © 2017 Hakcipta Terpelihara • Kumpulan Media Karang kraf

Source: <http://www.sinarharian.com.my/mobile/politik/orang-cina-sedang-menilai-tun-mahathir-1.785899>